


СПРАВОЧНИК
АКСАФОНИСТОВ
КАМЕНЬСКОГО
Д.А. БЕЛЬСКИЙ
САНКТ-ПЕТЕРБУРГ
ИЗДАТЕЛЬСТВО
"СОЛОВОДОВ"
В 1997 ГОДУ

Page 1 of 22



Акафист святому праведному Иоанну Кронштадтскому

Творение монахини Иоанны

Кондак 1

Великому пастырю и угоднику Божию, негасимою свещею за святое православие горящему, любовью Евангельскою ко всем людям от юности озаренному, благодарно воспоим, яко избранному сосуду Божией благодати: радуйся, праведный отче наш Иоанне, пастырю дивный и великий пред Богом молитвенниче.

Икос 1

От младенства Христа Бога паче всего возлюбивый и сердце горе имевый, узрел еси, шестолетен быв, блаженне Иоанне, Ангела Божия хранителя своего, рекшаго: да стоит окрест тя во спасение и охранение, Сего ради, яко избранника Божия, с любовью тя восхвалим:

Радуйся, благочестиваго кореню чадо возлюбленное;

Радуйся, в страхе Божиим от колыбели
взращенный.

Радуйся, с детских лет любовью всех
обнимаемый;

Радуйся, отроча тихий и кроткий, на помощь
всем поспешавый.

Радуйся, Ангела хранителя благими нравами
веселимый;

Радуйся, николиже того чим печалимый.

Радуйся, от младенства Церковь Христову
возлюбивый;

Радуйся, вся своя чаяния в храме Божиим
сосредоточивый.

Радуйся, святые угодники измлада почитавый;

Радуйся, их подвиги во имя Христово себе во
образ вменимый.

Радуйся, спутником детства святое Евангелие
имевый;

Радуйся, с ранних лет с благовестием
Христовым сроднившийся.

Радуйся, праведный отче наш Иоанне,
пастырю дивный и великий пред Богом
молитвенниче.

Кондак 2

Видяще тя, праведниче дивный Иоанне,
измлада по Бозе возревновавшаго, душою
чистою Духа Святаго приившаго и Им

таинственно ведомага, умиленно поем Богу:
Аллилуиа.

Икос 2

Великаго светильника Церкви Православныя
сиятельнаго Златоуста учителем своим
почитавай, богомудре Иоанне, дерзновение ко
Господу святителя Константинопольскаго
восприял еси. Темже, яко предстателю нашему,
взываем ти сие:

Радуйся, познанию премудрости Божией
младая лета посвятивый;
Радуйся, прелесть мира сего скоро
распознавай.

Радуйся, заповеди Христовы возлюбивый;
Радуйся, чиста от страстей себе соблюдый.
Радуйся, отца и мать сыновне почитавай;
Радуйся, под страхом смерти в недуге тяжцем
пост не нарушивый.

Радуйся, яко сокровище из сокровищ, книзи
святаго Златоуста полюбивый;
Радуйся, в смирении дар пастырскаго слова из
них почерпнувший.

Радуйся, измлада о спасении людей радевый;
Радуйся, души, во тьме пребывающия, звати к
свету Христову от юности стремивыйся.
Радуйся, видения храма Божия и в нем себе в

сане иерейстем сподобивыйся;
Радуйся, в храме сем до кончины своея Господу
и людем послуживый.
Радуйся, праведный отче наш Иоанне,
пастырю дивный и великий пред Богом
молитвенниче.

Кондак 3

Небесным лучем Триединого Бога возсиял еси,
отче, егда люди Земли Российстей, празднующе
память досточудного ревнителя Святыя Троицы
Спиридона Тримифунтскаго, обретоша в тебе,
праведниче дивный Иоанне, в день сей
промыслительне во иерея рукоположеннем,
своего заступника и веры Православных
поборника, поющего верно Богу: Аллилуиа.

Икос 3

Любы Евангельскую ко всем людем являя,
службы Божия в храме присно совершая,
покаяния проповедником стал еси, пастырю
Кронштадтский Иоанне, греси мнози на себе
принимая, души грешныя молитвою и любовью
согревая, к Чаше спасения звал еси неустанно.
Темже поем ти, яко богоносному отцу нашему,
таковая:

Радуйся, избранный во иереях Церкви
Христовы служителю;
Радуйся, святыни честное жилище.
Радуйся, николиже догматы Церкви и уставы
ея не преступивый;
Радуйся, святому Православию даже до
последняго часа своего потрудивыйся.
Радуйся, хулу и клевету и вся наветы кротко
претерпевый;
Радуйся, суетою мира сего себе не запятнавый.
Радуйся, пастырю благодатный;
Радуйся, столпе Церкви Православныя
непоколебимый.
Радуйся, лозо неоскудевающая винограда
Христова;
Радуйся, плод сторичный во спасенных душах
Богу принесший.
Радуйся, образ чистоты житием твоим всем
явивый;
Радуйся, вся, яже ко благоугождению
Господеви, и мудрствовать и деяти нас
наставивый.
Радуйся, праведный отче наш Иоанне,
пастырю дивный и великий пред Богом
молитвенниче.

Кондак 4

Вся во славу Божию творити от первых дней священства за правило себе вменивый, ни сна, ни отдыха не ведал еси, любвеобильне отче Иоанне. Имуще сердце, чужому горю сострадавшее, распенше плоть свою, до слез и пота о всех молился еси. Призрев на таковую к людем любви твою самозабвенную, посла Господь ти дар помощи чудодейственныя и молитвы дерзновенныя. Ты же, лучу светлый, во мраце страстей блистай, смиренно воспел Богу: Аллилуия.

Икос 4

Апостолом Христовым уподобивыйся, денно и нощно шел еси в лачуги убогия, святой отче Иоанне. Грязи и смрада не бояся, злаго смеха не страшася, возжигал еси в душах падших, отверженных Духа Святаго лампы спасения. Мы же пред величием твоим главы преклонше, поем ти, человече Божий Иоанне:

Радуйся,	сирых	защитниче;
Радуйся,	немощих	помощниче.
Радуйся,	странных	прибежище;
Радуйся,	гонимых покрове	и пристанище.
Радуйся,	скорбящих	утешение;
Радуйся,	плачущих	радование.

Радуйся, кротких надеждо и спасение;
Радуйся, гордых вразумление.
Радуйся, заблуждших исправление;
Радуйся, падших возстание.
Радуйся, света Евангельского блистание;
Радуйся, духов злобы всемошное отгнание.
Радуйся, праведный отче наш Иоанне,
пастырю дивный и великий пред Богом
молитвенниче.

Кондак 5

О сирых и падших радея, заложил еси,
пастырю добрый, дом трудолюбия в граде
Кронштадте, дабы души людския трудом и
молитвою спасати, уча всех ближняго любить и
киимждо днем живота своего Творца славить и
петь Богу: Аллилуиа.

Икос 5

Милосердыми делы твоими вся Земля
Российская украсися и далече за пределы ея
свет любви велия твоея пролияся. Мы же,
восхваляя тя, святой безсребренниче Иоанне,
умиленно взываем ти сице:

Радуйся, сердце, в бедах сущия согревающее;
Радуйся, душе, тысячи бедных, больных и
убогих в себе вместившая.

Радуйтесь, руки, неленостно людем
послужившия;

Радуйтесь, рамена, тяготы грешников на себе
носившия.

Радуйся, врачу, состраждуяй боли и слезам к
тебе притекающих;

Радуйся, образе милости преизобильныя,
николиже не ветшающий.

Радуйся, смирение, тихостию своею буйство
исцеляющее;

Радуйся, кротосте, неизчетныя дары Небесныя
вместившая.

Радуйся, от погибели заблудшия исхитивый;

Радуйся, отчаянным врата рая приблизивый.

Радуйся, любви Христовы Апостоле верный;

Радуйся, сосуде благодати Божией избранный.

Радуйся, праведный отче наш Иоанне,
пастырю дивный и великий пред Богом
молитвенниче.

Кондак 6

Нова дивна делателя вертограда Христова
страна Российская стяжа, егда изшел еси на
ниву Господню, яко отроков наставник и
Закона Божия учитель, право поющий Богу:
Аллилуиа.

Икос 6

Зря во всяцей душе лепоту Божию, безценное чадо Отца Небеснаго, возжигал еси в сердцах ученики своя свет истинный, неветшающий. Темже и мы, яко чада, к тебе прибегаем и молимтися: научи нас, якоже и ты, Бога любить и за вся Его великия благодеяния непрестанно славить и благодарить. Не остави без твоего пастырскаго попечительства, учителю славный и добрый наставниче, и нас, к тебе взывающих:

Радуйся, яко солнце души отрочи освещавый;
Радуйся, поросль добрую тем взрастивый.
Радуйся, всем сердцем Бога возлюбивый;
Радуйся, и ученики своя искренне Того любить научивый.

Радуйся, добродетельнаго жития всем образ явивый;

Радуйся, Православию верно послуживый.

Радуйся, семена веры живыя повсюду насеевавый;

Радуйся, хранить заповеди Божия неустанно призывавый.

Радуйся, милостивый душ израненных врачевателю;

Радуйся, грешных усердный взыскателю.

Радуйся, старых и молодых правый учителю;

Радуйся, страны Российския духовный просветителю.

Радуйся, праведный отче наш Иоанне, пастырю дивный и великий пред Богом молитвенниче.

Кондак 7

Звездой многосветлою явился еси, чудотворче дивный Иоанне: больныя исцеляяй, немощныя подкрепляяй, от смерти лютыя, вечныя прозорливо ограждаяй. Вся Россия твоими чудесы исполнися, в град Кронштадт людие непрестанно притекаша, с верою и упованием к тебе взываша, поя Богу: Аллилуиа.

Икос 7

Дивно в тебе Господь Бог прославися, егда верою живою твоею мертвии духом во всех концах земли оживляшася, дуси нечистии изгоняшася и со одра расслабленнии воздвигашася. Сего ради и мы благодарственно поем ти, чудотворче и целителю всехвальне Иоанне:

Радуйся, яко невозможно изчести вся чудеса, по твоим молитвам совершаемая;
Радуйся, надеждо в скорбех к тебе прибегающих.

Радуйся, и не чающих о твоей помощи
милосердное вспоможние;
Радуйся, и не ведавших тя любвеобильное от
бед спасение.
Радуйся, хулителей таинств скорое
вразумление;
Радуйся, безчинных верное исправление.
Радуйся, всем по вере исцеления даровавый;
Радуйся, паче и неверных николиже
отринувый.
Радуйся, границ неведующу любви имевый;
Радуйся, тем для дел благих границы держав
дальних отворивый.
Радуйся, инославныя верою истинною,
Христовою, просвещаяй;
Радуйся, вся языцы милуй и любовьию своею
обнимаяй.
Радуйся, праведный отче наш Иоанне,
пастырю дивный и великий пред Богом
молитвенниче.

Кондак 8

Святаго Православия поборниче, богомудре
отче Иоанне, возжигал еси неустанно на
родной земли лампы спасения — храмы и
монастыри русския, Державу хранящая и
души людския от пагубы ограждающая, Творцу
поющая: Аллилуиа.

Икос 8

На горе, освященной явлением Царицы Небесная, Господь сподоби тя, избранниче дивный Иоанне, во имя Успения Его Пречистая Матере преславный храм и обитель чудную заложити и во ону дев чистых, дочерей духовных своих собрати, дабы Матери Божией служить и тем Бога присно славить. Мы же, недостойнии, к заступлению твоему прибегая, яко пастырю нашему возлюбленному, благодарными усты взываем:

Радуйся, якоже по благоволению Пречистая Владычицы наша Богородицы первейшая обитель на Святей Руси во имя Успения Ея заложена бысть, тако и твоя обитель первая, пастырю добрый Иоанне, по смотрению Божией Матери, во славу Успения устроена бысть, традицию древнерусскую прияше;

Радуйся, якоже из Царьграда во Киев строители образ Успения — благословение Божией Матери — принесоша, тако и твои сестры, отче Иоанне, Успенскую икону, дарованную некогда Самою Владычицею Небесною, во обители присно хранят. Радуйся, яко икона сия чудотворная в соборе, открывшемся тебе в видении, блаженне

Иоанне, пребывает;
Радуйся, яко многая души окамененныя в мире
сем, забывшем Бога оживляет.
Радуйся, якоже обители сей до скончания века
стояти тобою предречеся;
Радуйся, милостию Божиею вся бури ратныя и
безбожныя до сего дне мимо ея пронесошася.
Радуйся, истинным пастырем и игуменом
обители на святей сей горе присно пребываяй;
Радуйся, попечительством своим николиже ея
не оставляяй.
Радуйся, праведный отче наш Иоанне,
пастырю дивный и великий пред Богом
молитвенниче.

Кондак 9

Христовых Тайн благоговейный служителю,
горняя присно мудрствуя, а не земная, был еси
во образ людем и пастырем, пред престолом
Божиим духом горя и поя Богу: Аллилуиа.

Икос 9

Священный сан высоко нося, искал еси прежде
Царствия Божия и правды Его, пред Лицем
Божиим себе присно зряще. Тесным и
скорбным путем в мире шествуя, в
воздержании, смирении, пощении и заповедей
Божиих непорочном хранении подвиги

мученик и преподобных совокупил еси и в вечныя кровы Отца Небеснаго со святыми водворился еси. Мы же на пресветлый лик твой благоговейно взирая, поем ти, праведниче Божий Иоанне:

Радуйся, воине Христов, в брань с духами злобы поднебесными безстрашно вступивый;
Радуйся, чада своя тем верно защитивый.
Радуйся, клянущих ты благословлявый;
Радуйся, за гонящих ты непрестанно моливыйся.

Радуйся, свете, омраченныя страстями сердца наша просвещая;
Радуйся, от работы вражия тем кийждодневно нас избавляя.

Радуйся, от стрел демонских правое охранение;
Радуйся, лести и козней диавольских верное посрамление.

Радуйся, узами любви Христовы чтущих тя крепко связавый;

Радуйся, николиже их в беде не оставивый.

Радуйся, яко предстательством твоим от язв греховных исцеляемся;

Радуйся, яко твоими молитвами безконечныя жизни сподобляемся.

Радуйся, праведный отче наш Иоанне, пастырю дивный и великий пред Богом молитвенниче.

Кондак 10

Новый пророче явился еси, отче Иоанне, зряще да углебоша языцы в пагубе и готови пасти в яму, юже соделаша. Звал еси Русь Святую веры и Церкви твердо держатися, да быв богомерзское сонмище и пагубное соборище не обратится. Но, яко Иерусалим, избивый пророки и камением побивавый посланные к нему чада Божия собрати, тако и над тобою, праведниче и пророче российский Иоанне, лживии и нечестивии глумишася и в безумии и гордых очию ослеплении, яко вороны чернии, тебе гнаша и речам твоим, на погибель свою, не внимаша. Фарисее же, слово твое слышавше, како некогда притчи Христовы, разумеша, яко о них глаголеши, и над тобою, мужу непорочен, трезвен, честен и учителен, с лютою злобою ругашася и до смерти тебе поносиша. Ты же, за вся славяще и благодаряще, воспел Богу: Аллилуиа.

Икос 10

Праведный гнев Божий страну Российскую потрясе, егда твоим глаголам языки не вняша и от Господа Бога своего отрекошася. Темже молимтися: скорбь верных чад твоих видяще, подаждь всем, во мраце безбожия

пребывающим, духовное озарение и глубокое покаяние, да обратившись ко Господу, милости Его и благодати неизреченныя людие Земли Российския сподобятся. И яко молитвеннику нашему и предстателю, в смирении глаголем таковая:

Радуйся, очей ослепленных прозрение;
Радуйся, хулителей и гонителей твоих скорое посрамление.

Радуйся, Святыя Троицы славный угодниче;
Радуйся, покаяния велегласный проповедниче.

Радуйся, спасительными путями
непреткновенно ступати всех наставляяй;
Радуйся, мрак духовнаго неведения присно разгоняяй.

Радуйся, от уз смерти лютыя милосердно избавляяй;

Радуйся, в Живот Вечный непрестанно просвещаяй.

Радуйся, яко огнем любви своея лед гордыни расплавляеши;

Радуйся, яко чистотою своею пламень страстей угашаеши.

Радуйся, омывати грехи слезами покаяния отечески призываеши;

Радуйся, тем геенны адския верно избавляеши.

Радуйся, праведный отче наш Иоанне,

пастырю дивный и великий пред Богом
молитвенниче.

Кондак 11

Славная жизни во Христе дивное сияние явил
еси, праведный отче Иоанне, в своем
пастырском людем заветании — твоих рук
честных творении. Отворил еси чадам твоим
своея души пламенное веры и любви ко Господу
горение, минуты духовного созерцания и покоя
в Бозе благоговейного. Мы же, благодарнии,
поем Богу: Аллилуиа.

Икос 11

Благочестия изрядный наставниче, даровал еси
всем людем, алчущим спасения, опыт свой
многотрудный на пути всемогущаго духовнаго
возрастания и добродетелей Евангельских
преизобильнаго стяжания. Писания твоя языки
мнози истинным благочестием своим
удивляше, учебником спасения и в брани с
врагом оружием чудесным сташа. Мы же за
утешение велие и радование несказанное,
твоими труды нам дарованныя, со
благодарением поем ти, отче Иоанне:

Радуйся, духовная радости сияние;
Радуйся, света Божия озарение.

Радуйся, душ наших утешение;
Радуйся, печалей и скорбей скорое отгнание.
Радуйся, лучу небесный, сердца наша освещающий;
Радуйся, пастырю добрый, души чад своих на камени веры воздвизающий.
Радуйся, в брани духовней нас укрепляющий;
Радуйся, от прелести фарисейския строго охраняющий.
Радуйся, простоте младенчестей нас научающий;
Радуйся, верою и любовью присно горящий.
Радуйся, ересей отсекающему;
Радуйся, святых Святейшему Слову верный служителю.
Радуйся, праведный отче наш Иоанне, пастырю дивный и великий пред Богом молитвенниче.

Кондак 12

Поюще дивнаго во святых Своих Царя Небеснаго, многими чудесы тя, праведниче Иоанне, прославльшаго, молимтися, милосердие твое призывающе, дабы светильницы наши не угасли и наполнили бы мы сосуды душ наших елеем дел благих и всем сердцем вознесли Богу: Аллилуиа.

Икос 12

Празднующе память твою, пение хвалебное приносим ти, досточудне отче Иоанне, яко Христу последовавше, с Богом на земли сопребывал еси и ныне во веки с Ним пребываеши:

Радуйся, якоже Спаситель торгующия из Храма Божия изгнаше, тако и ты, отче Иоанне, из храма души человеческия — предуготовленного дому Господня — всяку мерзость, противную Богу изгонял еси;

Радуйся, якоже Учитель с мытари и грешники ядоше и пияше, тако и ты, святой отче, в лачугах бедных со отверженными трапезу убогую делил еси и плакал еси с плачущими, и радовался еси с радовавшимися.

Радуйся, яко Агнец прямо стригущаго Его безгласен, поношения от имущих души непросвещенныя и во тьме бывшия претерпел еси;

Радуйся, яко Той, тяжце сердцем о скорбящих болел еси и любовью своею горе покрывал еси.

Радуйся, яко Той, ревностен был еси, отче, ко спасению из льстивых лап волка овцы, неведущия Пастыря своего;

Радуйся, яко Пастырь Добрый, душу свою за люди своя положил еси.

Радуйся, великий чудотворче и целителю;
Радуйся, молитвы дерзновенныя, простоты
сердечныя и агнче незлобивости учителю.
Радуйся, спасения нашего богомудрый
наставниче;
Радуйся, Православия верный поборниче.
Радуйся, пророче Земли Российския и ея
великомучениче;
Радуйся, яко некогда страдания
избыточествовали в тебе, тако ныне
избыточествует утешение.
Радуйся, праведный отче наш Иоанне,
пастырю дивный и великий пред Богом
молитвенниче.

Кондак 13

О великий праведниче и чудотворче Иоанне!
Исповедующе тя, яко заступника нашего и
предстателя, аще бо и недостойны есмы
таковаго отца и ходатая, к тебе припадаем:
приими от нас, недостойных и грешных, сие
малое приношение и умоли милостиваго Бога
избавитися нам муки вечныя и геены огенныя,
да сподобимся вместе с тобою, возлюбленный
пастырю наш, присно пети во Святей Троице
Единому Богу: Аллилуиа.

Сей кондак глаголи трижды, затем икос 1-й «От
младенства...» и кондак 1-й «Великому пастырю..».